

元豐類藁

冊七

元豐類稿

卷之六

南豐先生元豐類藁卷第三十八

祭文

祭歐陽少師文

惟公學爲儒宗材不世出文章逸發醇深炳蔚體
備韓馬思兼莊屈垂光簡編焯若星日絕去刀尺
渾然天質辭窮卷盡含意未卒讀者心醒開蒙愈
疾當代一人顧無儔匹諫垣抗議氣震回遁鼓行
無前跋扈非恤世僞難勝孤堅竟室紫微玉堂獨
當大筆二典三謨生明藏室頓挫彌厲誠純志一
斟酌損益論思得失經體慮萌沃心造膝帝曰汝
賢引登輔弼公在廟堂尊明道術清靜簡易仁民
愛物斂不煩苛令無迫猝棲置木索里安戶逸櫝
斂兵革天清地謐日進昌言從容密勿開建國本

情忠力悉卯未之歲龍駕飈歟再拯大艱垂紳秉
笏乾坤正位上下有秩功被社稷華夷召畢公在
廟堂總持紀律一用公直兩忘猜狃不挾朋比不
虞訕嫉獨立不回其剛仡仡愛養人材獎成誘掖
甄拔寒素振興滯屈以爲己任無有廢咈維公平
生愷悌忠實內外洞徹初終若一年始六十懇辭
冕黻連章累歲乃俞所乞放意丘樊脫遺羈馭沉
浸圖史左右琴瑟氣志浩然不陋蓬華意謂百齡
重休累吉還幹鼎軸贊微計密云胡傾殂愍遺則
弗聞訃失聲皆淚橫溢慙冥不敏早蒙振袂言繇
公誨行繇公率戴德不酬懷情獨鬱西望轎車莫
持紉紼維公瑩瑩德義譔述爲後世法終天不沒
託辭敘心曷究髣髴

祭王逵龍圖文

惟公有獨立之志不羈之材揚旌闐楚按節江淮
止如山淵動若風雷衆皆異其施設曾孰測其津
涯若夫拯急難於水火下雋傑於蒿萊越拘攣而
不惑豈淺狹之能偕至於稱物引類興言寓懷遠
參騷雅近雜嘲諧麗兼組藻美軼瓊瑰皆足以聲
駕多士望隆九陲然而位不過郎中名不過直閣
流落白頭委蛇一壑豈人事之當然信命存於冥
漠昏愚不肖早辱公知拊循愛勉施及其私聞公
之逝惻楚歔歔戴德莫酬寓薦以辭

祭張唐公文

熙寧六年六月一日

惟公作德于躬實方實厚實夷實訐實堅實茂彼
嗜而爭我有不惑彼嫵爲朋我肆而持我抗其辭

維彼之默始燁其華儒林禮官迺碩其寔侍從之
班維帝時咨維士時附尚其昌言式久在序告疾
于朝迺長南服里無嘆聲士女輯穆以老得謝俶
其歸裝車御未驅訃聞四方維余先人公同年友
公子我姪又託婚媾實殽于豆實酒于觴馳辭告
誠維以永傷

祭孔長源文

嗚呼長源拔迹孤艱刻志勵力升德自幽迺不家
食燕其壽母歸養以色興其士友跂我淳則微獨
考古載辭于策亦從爾知有婉軍畫爲長以舒爲
將不亟迺使荆粵銓材著職滅熄苛燒蘇僵博瘠
會稽之治里無猝迫初以詆去民實載德卒還省
部廷論之直維曰將歸東符之析孰云不幸奄與

生隔有親九十世爲楚惻維其篤行匪矜匪飾其
彪爲文其濡爲澤天與厥後賢能交蹠有實有華
光長譽白善豈無勸慶焉茲得維我與公綢繆平
昔詩書討論相求以益我試于鄉自公考擇彌久
彌親情隆意獲聞公之訃泫然心盡馳奠千里寓
陳悃悃

祭王平甫文

熙寧十年十月二十一日

嗚呼平甫決江河不足以爲子之高談雄辯吞雲
夢不足以爲子之博聞強記至若操紙爲文落筆
千字徜徉恣肆如不可窮秘恠恍惚亦莫之係皆
足以高視古今桀出倫類而况好學不倦垂老愈
專自信獨立在約彌厲而志屈於不申材窮於不
試人皆待子以將昌神胡速子於長逝嗚呼平甫

念昔相逢我壯子稚間託婚姻相期道義每心腹
於超軼亦情親於樂易何堂堂而山立忽泯泯而
飈駛訃皎皎而猶疑淚泱泱而莫制聊寓薦於一
觴纂斯言而見意

祭宋龍圖文

嗟乎次道公之

之一字無

於古今典章沿革得之於心

山藏海積又於舊聞隱顯纖悉析之以口天高日

白公在朝廷羣公百司解惑釋疑公爲著龜公在

太史維僚與屬正繆辨訛公爲耳目今公忘矣廷

有大議問故事者衆失其歸國有大典考前載者

人失其師况公行不絕俗而動有常度言不忤物

而辭無可疵靖退之風愈老而彌邵方直之操自

信而不回至於篤友尚舊比義親仁追往烈而競

逐豈庸態之能隣然而蚤蹈屬於儒官晚委蛇於
從臣曾未得歷禁林之獻納任廊廟之彌綸何鸞
儀而鵠峙忽飈逝而星淪哭公之喪者客不絕於
門庭弔公之家者使相望於道路維昏鈍之少與
獨綢繆而有素淚淋浪而莫收情怛而奚慙嗚
呼唐季五君史曠其錄公蒐亡而集寶蓋旁羅而
遠屬至於帝宅神州祖功宗德咸在筆削具存方
冊爭日月之光輝與天地而終極則公位雖屈而
未盡名益久而逾章彼富貴而磨滅豈得公之毫
芒纂餘哀而以此聊寓薦於一觴

祭亡妻晁氏文

子有仁孝之行勤儉之德宏裕端莊聰明靜默窮
達能安死生不惑可以齊古淑人爲世常則歸我

之昔明年始筭言無疵悔動應衡規親疎悅慕稚
艾嗟咨事姑之禮左右無違服難體順惟日孜孜
諧我屬人又篤以私有犯不校有勞不施人隆己
約乃以爲宜衣有穿弊珥無光輝曰順吾性餘復
何爲紛紛綸世務偪仄羣疑子陳得失効若著龜及
其旣退婉婉其儀不矜以色不伐以辭幽閒深謚
度量誰窺吾貧口衆智不繼資脫粟藜藿具無鹽
醯人不堪憂子獨怡怡綰綰雖愛不偏以慈訓誨
惟謹曰宜幼時我扶我翼共處窮羈鋤荒補漏細
大無遺嗚呼天禍我家降集凶厲始來京師辛丑
之歲子之方壯疾疹中傷孰云此日一女先亡子
雖自達病豈宜然自秋至春有益無痊迎醫市藥
我力爲殫術寧非善不勝于天將逝之昔逆知其

期語論自若精神不衰徧召室人告以長歸嗚呼
哀哉父失賢女姑亡孝婦子喪嚴師吾虧益友時
歲雖往悲酸則新禪月之終奠此一樽教養二子
期獲子心時良返子託葬先林言如不復誰爲我
人長號叙哀寓以斯文

祭晁少卿文

鞏蚤以孤蒙與託嘉好自始迄今踰二十載繾綣
相與義厚情親會合乖闊則有書問開紙披辭猶
若際遇不意今者公遽淪亡得訃歔歔涕隨聲發
海濱獨哭心與誰言仍聞歸旆旅次餘杭隔此濤
江寓陳薄奠公乎知否已矣柰何

館中祭丁元珍文

嗟乎元珍別子幾時孰謂子往無復來期子之爲

人渾厚平夷不阻爲崖不巧爲機朋僚悅附族黨
懷依其動恂恂必應繩規其語諄諄不見瑕疵從
事之畫吾無妄隨長人之政彼有遺思其蓄鈞石
其出銖鎰惟夫學問富有書詩濡墨操紙寫之文
辭春陽滿野萬物榮滋匪營匪飾疊異并奇旣精
衆作於詩復尤清新俊逸與古爲儔讀之灑然可
破百憂哀鳥之秩天祿之遊謂淹已久旣晚方收
孰云未幾斥置南州書猶未復計已來投衆爲哀
傷况於吾屬初疑終駭哭淚滿目莫矧子棺莫襚
子服禮多不及情豈能忘寓辭千里侑此一觴

朝中祭錢純老文

嗚呼公平窮經及史旁兼百氏廢寢與食不虛寸
晷篤好無倦華顛愈勵強記多識箱書屋侍闕議

崇論河垂海委詩賦講說射策三科金馬玉堂經
帷三職寒苦自至無馮與翼銓綜再試士曰予歸
尹正三歲衆曰予依公於所聞維學之力公於所
知則維自得利害之際人鮮能安彼爲惴惴公獨
桓桓愛惡之情人鮮自克彼有贅虧公爲衡石世
所並逐公有不求彼囂我靜則莫我尤曾不三事
位云未究曾不百年數云非壽殲國之良在列嗟
咨隕民之望耄艾獻歎天子聞喪馳使臨視勞恤
煢孤賙憐乏匱凡我同朝矧曰同志哀由感觸孰
知失涕寓馬在庭薦羞在几公乎來哉寄誠茲誄

祭李太尉文

公先種德碩大于久母宋仁祖維莊懿后公維后
姪考異姓王入長六師外垣大邦不以貴盈遜悌

慈良昭陵未遠公奄云亡轎車之東致薦一觴

祭致仕湛郎中文

維公早以郎潛安於養志晚而家食曾不待年治績紀於朝廷行實推於鄉里淪亡未遠窀穸有期竊仰高風敢陳薄奠

又祭亡妻晁氏文

輦無狀遭禍早失賢妻徘徊京師零丁孤宦迺致旅襯未就先塋夙夜思惟心顏愧怍今蒙恩補外道出東南敢啓敢宮進登舟御間關回阻將致鄉園而輦比至淮瀕迫趨官守其於奉承靈輦經涉大江方復假人經營護視永惟見亮尚賴有靈若夫觸冒川途幾數千里使保清謚則惟餘休至於推擇吉辰脩嚴葬禮俟得時日敢不躬親惟其鑒

之故以情告

代人祭李白文

子之文章傑立人上地闢天開雲蒸雨降播產萬物瑋麗瑰奇大巧自然人力何施又如長河浩浩奔放萬里一瀉末勢猶壯大騁厥辭至於如此意氣飄然發揚儔偉飛黃馱馱軼羣絕類擺弃羈馽脫遺轍軌捷出橫步志狹四裔側睨駑駘與無物比始來玉堂旋去江湖麒麟鳳凰世豈能拘古今僻儒鉤章摘字下里之學辭卑義鄙士有一曲拘牽泥滯亦或狡巧爭馳勢利子之可異豈獨茲文輕世肆志有激斯人姑熟之野予來長民舉觴墓下感嘆餘芬

祭王都官文

維公材敏而宏志眎萬里高辭大篇出仕天子主簿于閩聲駕其長清江之謀矯矯逾壯于韶于昇條教出己伺公所爲萬目齊眎奪奸于幽耄吏喪膽悍黨睢睢根抵卒斬里謳戶歌惟惇寡獨在右惟監在下惟屬在側惟僚相講戴服將起將昌俞考以難曷赴曷歸忽殞無還公於先人實歡實厚至公諸子輦辱親友於公家行表裏洞知於黨不校於尊不違出升公堂不撓毫髮退從其私婉婉曲折鍾山崢嶸下惟江水昔公此臨委蛇寫履今子六人葬公于此銘輦之爲辭貧事偉千里寄誠以茲一簋

祭袁大監文

於乎越蜀荆吳三方萬里公馬駢駢幙印而使蠻

墟海聚獄無濫辭峨嵋邛犍貨走京師東南之粟
風颿手笮歲填太倉萬艘尾錯遂副會府肆其心
畫出屏于宣以我偃側九卿之行得謝以歸冕弁
入里昔時布衣進退則然當世所嗟不貴以驕不
富以奢翼翼其行坦坦其衷隤然順退長者之風
白髮雖多几杖未隨笑言在耳已哭于帷眷然撫
我孰如公尤先人不幸託載公舟我生方屯戴德
莫疇羞醪則微以陳我悲

祭關職方文

嗚呼關公以文中科以材爲吏艱于厥初四十始
仕終領兩州其治大肆告老于朝郎官以歸卿士
大夫觀望嗟咨孰爲公居竹水之寰孰爲公園正
據湖山公出公休八子侍側仕者大半同時共籍